

HEBREWS

Di Lede ang gi Digau o Hebrew

Di haga modongoohia:

Di lede ang gi digau o Hebrew la ne hihi ang gi di hagabu-ulinga dama a Christ ala guu tale gi di haingadaa, idimaa digaula nia dama ni Christ, gei digaula bolo gaa kili gi daha nadau hagadonu. Tangada dela ne hihi di lede deenei e hagamaaloo aga nadau hagadonu. Mee e agoago gi digaula bolo Jesus Christ la go di hagagida hagaodi ge donu ni God. Tangada hihi e haga modongoohia nia donu e dolu (3):

1) Jesus go Tama a God, dono hagaodi ai, ne hagalongo huoloo gi dono Damana i dana kae di hagaduadua. Malaa, deenei di hai o Tama a God, Jesus e aamua i nia soukohp ala i lodo di Beebaa Namua, i digau di langi, mo Moses.

2) God gu haga modomodongoohia di hai o Jesus ne hai tangada hai mee dabu dono hagaodi ai, e koia e aamua i digau hai mee dabu mai namua.

3) Tangada dela ma ga hagadonu a Jesus, geia gu mehede gi daha mo ono huaidu, di made, mo di madagu. Jesus, Tagi Aamua Hai mee dabu e wanga gi nia daangada di hagamouli e donu, dela nogo hai dono ada go nnagadilinga haihai daumaha mo nia tigidaumaha manu o digau o Jew.

Tangada hihi e hagamaaloo aga digau ala ma gaa dau di lede deenei, bolo gi daudalia hua beelaa, gi manawa dahi gi nadau hagadonu, gei ilodo di mada e11, mee e haga langahia labelaa digau ala ne kila humalia nadau hagadonu i lodo di kai digau Israel. Gei mee e hagamahi

gi digaula i lodo di mada e 12 bolo gi daudalia i di man-awa dahi gaa dae loo gi di hagaodi, gii mmada gi Jesus, ge gii tuu maaloo i lodo di hagaduadua mo nia dadaaligi huogodoo ala e tale ang gi digaula.

Mee ne haga lawa dana lede deenei gi nia helekai haga-maaloo.

Di hagahonu di beebaa deenei:

Christ di haga modongoohia dogomaalia o God (1.1-3)

Christ koia e aamua i digau di langi (1.4–2.18)

Christ koia e aamua i Moses mo Joshua (3.1–4.13)

Nnegau hai mee dabu a Christ koia e aamua i nia hegau digau hai mee dabu (4.14–7.28)

Di hagababa a Christ koia e aamua i nia hagababa huogodoo (8.1–9.22)

Tigidaumaha a Christ koia e aamua i nia tigidaumaha ala i golo (9.23–10.39)

Di hagabalagau o di hagadonu (11.1–12.29)

Di hagaodi o di lede deenei (13.1-25)

Nnelekai a God mai baahi dana Dama

¹ Imua loo gei God ne helekai gi tadau maadua mmaadua mai baahi nia soukohp inia hagadilinga ala i nia holongo e logo. ² Gei i lodo nia laangi muliagi aanei, God ne helekai mai gi gidaadou mai baahi dana Dama. God ne hai di langi mo henuailala mai i dana Dama, gei God gu hilihili a Mee e hai mee gi nia mee huogodoo i di hagaodi. ³ Mee e maahina be di madamada o God, e hai gadoo be God. Mee e daahi di langi mo henuailala gi ana helekai mogobuna. I muli dono haga madammaa nia huaidu o nia daangada huogodoo, Mee guu noho i di baahi gau donu o God, go di Mogobuna Muginua.

Di aamua Tama a God

⁴ Tama a God la ne hai gi mada aamua i digau di langi, gadoo be dono ingoo dela ne wanga gi de la le e mada aamua i nadau ingoo. ⁵ Idimaa, God la digi helekai gi tei ana gau di langi boloo,

“Goe go dagu Dama daane,

dangi nei gei Au guu hai Tamana ni oou.”*

Gei God digi helekai labelaa i tei ana gau di langi boloo,

“Au gaa hai Tamana ni mee,

gei Mee gaa hai Tama daane ni aagu.” *

⁶ I mua di madagoaa God ne hagau mai dana Dama gi henuailala, Mee gu helekai boloo,

“Digau di langi a God huogodoo

e hai loo gi daumaha gi Mee.”*

⁷ Deenei di mee a God ne helekai ai i digau di langi boloo,

“God e hagau ana gau di langi be nia madangi,

ga hagau ana gau hai hegau be nia ulaula o di ahi.”*

⁸ Gei God gu helekai i di Tama boloo,

“Meenei God, do lohongo king

gaa noho hua beelaa!

Goe e dagi au daangada gi di tonu.*

⁹ Goe e aloho i nia mee ala e donu,

ge e de hiihai gi nia mee hai gee.

Delaa laa, doo God guu dugu Goe

gi baahi nua o ehoo

i dana hagatulu Goe gi di lolo o di tenetene.”

¹⁰ Mee gu helekai labelaa,

“Goe go Tagi, ne hai henuailala i taamada,

oo lima ne hai nia haga honu nia langi i nua.*

¹¹ Nia mee huogodoo aanei ga hagalee,

* 1.5: Pisalem 2.7; 2 Samuel 7.14; 1 Kronikel 17.13

* 1.5: 2 Samuel 7.14

* 1.6: Deuteronomy 32.43 * 1.7: Pisalem 104.4

* 1.8: Pisalem 45.6-7

* 1.10: Pisalem 102.25-27

gei Goe e noho hua beelaa.
Nia mee huogodoo ga hagalee,
gadoo be nia gahu ala e ngudu.

¹² Goe gaa wini nia maa be di gahu ulu laa daha,
ga waahei be nia gahu uluulu,
gei Goe e noho hua be Goe,
e mouli gaa hana hua beelaa.”

¹³ God digi helekai gi tangada i ana gau di langi boloo,
“Noho i dogu baahi gau donu,
gaa dae loo gi dogu madagoaa gaa dugu o hagadaumee
gi lala o babaawae.”*

¹⁴ Digau di langi la nia aha? Digaula la nia hagataalunga
e hai hegau gi God, ge ne hagau mai belee hagamaamaa
digau ala ga hai mee gi di hagamouli.

2

Di Hagamouli aamua

¹ Deenei tadinga gidaadou e hai loo gi daahi gii mau
di tonu dela gu longono gidaadou, gi deeme di lahi gi-
daadou gi daha. ² Nnelekai ala ne hagadele go digau
di langi ang gi tadau maadua mmaadua, la nia helekai
e donu. Gei digau ala digi daudali be hagalongo gi nia
maa, e kae di hagaduadua dela e tau anga. ³ Malaa
e hai behe? Gidaadou e mee di tanga gi daha mo di
hagaduadua deenei, maa gidaadou ga haga balumee di
haga mouli aamua deenei? Matagidagi, Tagi ne hagailoo
di haga mouli deenei, ga nomuli, go digau ala ne longono
mai i Mee ala ne haga modongoohia mai gi gidaadou bolo
ma e donu. ⁴ I di madagoaa la hua, God gu haga puni anga
ana haga modongoohia gi nia haga modongoohia digaula
bolo ma e donu i dana hai nnagadilinga haga goboina,

* 1.13: Pisalem 110.1

mo dana dugu mai gi gidaadou nia wanga dehuia o di Hagataalunga Dabu, gii hai be dono manawa.

Tangada dela e dagi gidaadou gi di haga mouli

⁵ God la digi dugu ang gi digau di langi gi dagia henu-ailala hoou dela e hanimoi, henuailala hoou deenei dela e helehelekai ai gidaadou. ⁶Tama madagoaa dulii i lodo di Beebaa Dabu e haga modongoohia boloo,

“Meenei God, tangada la di aha,

dela e haa manawa iei Goe?

Tangada le e balumee hua,

dela e benebene Kooe?*

⁷ Goe guu kae a mee laa lala digau di langi

i lodo tama madagoaa dulii,

gei Goe gu haga uda gi Mee di madamada mo di aamua.

⁸ ge gu haga menege aga a Mee

e dagi nia mee huogodoo.”

E helekai boloo, “God gu haga menege aga a Mee e dagi nia mee huogodoo,” e hai dono hadinga, bolo deai dahi mee i golo digi dagia go Mee. Gei gidaadou digi mmada gi tangada e dagi ana mee huogodoo dolomeenei.

⁹ Gei tadau mee dela e gidee gidaadou la go Jesus! Di madagoaa bodobodo, gei Mee gu haga menege gi lala o digau di langi, gei dolomeenei, Mee gu haga uda ginai di madamada mo di aamua, idimaa, Mee guu kae di hagaduadua, guu made. Deenei go tumaalia o God mai dana Dama go Jesus, dela ne made gi digau huogodoo.

¹⁰ God dela ne hai ana mee huogodoo, gei e haga mouli ana mee huogodoo, e donu hua go dana hai a Jesus gii dohu dogomaalia mai dono hagaduadua, belee laha mai nia dama dogologo gi dono madamada. Idimaa, go Jesus dela e dagi digaula gi di haga mouli.

* 2.6: Pisalem 8.4-6

¹¹ Mee e haga madammaa gi daha nia huaidu o nia daangada, gei digau ala gu madammaa nadau huaidu, gu madalia Jesus guu hai damana gi Tamana hua e dahi. Jesus hagalee langaadia i dana haga ingoo digaula bolo nia duaahina ni oono. ¹² Mee ga helekai,

“Meenei God, Au ga hagi anga

gi ogu duaahina au mee ala ne hai,

ga hagaamu Goe i lodo nadau dagadagabuli!”*

¹³ Mee e helekai labelaa,

“Au ga hagadagadagee gi God.”

Mee e helekai labelaa,

“Deenei au, e noho madalia nia dama

ala ne dugu mai go God gi di Au.”*

¹⁴ Nia daangada aanei le e haga ingoo go Mee bolo nia dama, aalaa go nia daangada nadau dodo mo nadau goneiga; Jesus guu bida hai e Ia gii hai be digaula guu hai tangada. Mee ne hai di mee deenei bolo Ia gaa made, ga hunahuna gidaha a Setan, dela edagi di made.

¹⁵ Mee ne haga dagaloaha digau ala nogo hai nia hege i di waalooloo o nadau mouli, idimaa, digaula nogo mmaadagu i di made. ¹⁶ Di mee deenei guu donu bolo ma

hagalee go digau di langi ala e hagamaamaa go Mee, gei go di hagadili Abraham.* ¹⁷ Malaa, di mee deenei guu donu

bolo Mee guu hai be ono duaahina i nia hagadilinga ala huogodoo, gei mee guu hai di nadau Dangada Aamua Hai mee dabu dela e dumaalia ge manawa dahi i dana hai hegau gi God, belee dumaalia gi nia huaidu o nia daangada. ¹⁸ Malaa, Mee e mee di hagamaamaa digau

ala e tale gi di hagamada, idimaa, Mee guu kae labelaa di hagamada mo di hagaduadua.

* 2.12: Pisalem 22.22 * 2.13: Isaiah 8.17,18 * 2.16: Isaiah 41.8-9

3

Jesus koia e aamua i Moses

¹ Ogu duaahina dama Christ ala ne hilihili go God, mmada gi humalia gi di hai o Jesus dela ne hagau mai go God gi gidaadou, belee hai tadau Dagi Aamua Hai mee dabu o di hagadonu dela e hagadele go gidaadou. ² Mee nogo manawa dahi anggi God dela ne hilihili la belee hai tegau deenei, gadoo be Moses dela nogo manawa dahi anggi dana hegau dela ne hai anggi di madawaawa a God.* ³ Tangada dela e hau dono hale, koia e kae dono hagalabagau laa hongo di hale dela ne hau go mee. E hai gadoo be Jesus, dela koia e tau anga di kae nia madamada laa hongo Moses. ⁴ Nia daan-gada le e hau nia hale, gei God e hau nia mee huogodoo. ⁵ Moses e manawa dahi i lodo di madawaawa a God, gei mee tangada hai hegau ni God, e haga iloo nia mee ala ma ga kila aga maalia. ⁶ Gei Christ go Tama a God e manawa dahi, idimaa, go Mee dela e dagi di madawaawa a God, aalaa go gidaadou, maa gidaadou gaa lodo hagamaha mo di hagadagadagagee, gaa dae loo gi di hagaodi.

Di hagamolooloo nia dama a God

⁷ Di Hagataalunga Dabu e helekai,
 “Maa goodou gu longono di lee o God dangi nei,*
⁸ gei hudee haga hamaaloo ina godou lodo hai baahi gi
 God,
 be godou maadua mmaadua
 i di madagoaa dela nogo hai baahi gi God
 i lodo di anggowaa i dahi laangi
 ne hagamada a Mee.
⁹ God gu helekai boloo,

* 3.2: Numbers 12.7 * 3.7: Pisalem 95.7-11

'Ma e aha maa godou maadua mmaadua
guu mmada gi agu mee ala nogo hai
i lodo nia ngadai e madahaa,
gei digaula e hagamada hua Au.'

¹⁰ Gei Au gu hagawelewele gi digaula,
ga helekai,

'Digaula e huli gi daha mo Au
i nia madagoaa huogodoo,
gei e hagalee hagalongo gi agu haganoho.'

¹¹ Au gu hagawelewele,
guu hai dagu hagababa mau dangihi boloo,
'Digaula hagalee loo e ulu gi lodo tenea
dela ne hagababa ko Au
belee hagamolooloo ai ginaadou.' "

¹² Ogu duaahina nei, gii pula i goodou gi de hai gee hua
dahi dangada, ga hagalee hagadonu, gaa hidi iei
mee gaa huli gi daha mo di God Mouli. ¹³ Goodou
gi hagadai hagamaamaa inia laangi huogodoo, idi
waalooloo telekai bolo go "dangi nei" i lodo di Beebaa
Dabu e hai mai gi gidaadou, gi de halahalau hua goodou
go nia huaidu gaa hidi ai goodou ga hamaaloo godou
manawa. ¹⁴ Maa gidaadou ga haga mau dangihi tatau
hagadagadagagee dela ne hai mee ginai gidaadou mai loo
i taamada, gaa dae loo gi di hagaodi, malaa, gidaadou
gaa dau madalia a Christ. ¹⁵ Di Beebaa Dabu gu helekai,
"Maa goodou gu longono di lee o God dangi nei,
hudee haga hamaaloo ina godou lodo,
be godou maadua mmaadua

i di madagoaa dela nogo hai baahi gi God."*

¹⁶ Ma koai ne longono di lee o God, gei e hai baahi gi
Mee? Go nia daangada huogodoo ala ne dahi mai go Moses

* 3.15: Pisalem 95.7-8

gi daha mo Egypt.* ¹⁷ Ma koai ne hagawelewele ginai a God i lodo nia ngadau e madahaa? Mee ne hagawelewele gi nia daangada ne hai di huaidu, ala ne mmade i lodo di anggowaa. ¹⁸ God guu hai dana hagababa mau dangihi,
 “Digaula hagalee loo e ulu gi lodo tenua
 dela ne hagababa ko Au belee hagamooloo ai digaula!”
 Ma koai ala e helehelekai iei Mee? Go digau de hagalongo.
¹⁹ Gidaadou e mmada gi digaula ala gu deemee di ulu i
 tenua deelaa, idimaa, digaula hagalee hagadonu.

4

¹ God la gu hagababa bolo gidaadou e mee di kae di hagamooloo dela ne helekai iei Mee. Gidaadou la gi hagamahi gii pula i gidaadou, gi dee doo tangada i goodou ga deemee di kae di hagamooloo. ² Idimaa gidaadou gu longono di Longo Humalia be digaula. Gei di maa dono dahidamee gi digaula ai, idimaa digaula ne longono hua, gei digi hagadonu. ³ Gei gidaadou ala gu hagadonu, e kae di hagamooloo be di hai o dana hagababa mai gi gidaadou, dela gu helekai,
 “Au gu hagawelewele guu hai dagu hagamodu
 bolo digaula hagalee loo e ulu gi lodo tenua
 dela ne hagababa ko Au
 belee hagamooloo ai digaula!”*
 Mee ne helekai beinei, ma eaha maa dana hegau la guu lawa di hai i di madagoaa ne hai henuailala.
⁴ Idimaa, di gowaa dului i lodo di Beebaa Dabu e helekai i di hidu laangi,
 “Di hidu laangi, gei God ne hagamooloo
 i ana hegau huogodoo ala ne hai.”*

* 3.16: Numbers 14.1-35 * 4.3: Pisalem 95.11 * 4.4: Genesis 2.2

⁵ Nia helehelekai aanei e helekai labelaa i di gowaa i golo, boloo,

“Digaula hagalee loo e ulu gi lodo tenua

dela ne hagababa ko Au belee hagamolooloo ai digaula.”*

⁶ Digau ala ne longono di Longo Humalia matagidagi, digi kae di hagamolooloo, idimaa, digaula digi hagamolu. Malaa, gei hunu gau i golo gu dumaalia anga gii kae di hagamolooloo.

⁷ Di mee deenei la gu haga modongoohia aga go di haganohonoho a God bolo di laangi labelaa e dahi i golo e haga ingoo bolo “dangi nei”. I muli hua nia ngadau e logowaahee, gei God la gu helekai di maa gi David, i lodo nia helekai agoago guu lawa di hihii boloo,

“Maa goodou gu longono di lee o God dangi nei,

hudee haga hamaaloo ina godou lodo.”*

⁸ Maa nei bolo Joshua la guu wanga gi nia daangada di hagamolooloo gii hai be di hagababa a God, gei God la hagalee helekai labelaa i tuai laangi.* ⁹ God la dana laangi hua igolo e hagamolooloo ana dama, be di laangi a God e hagamolooloo i di hidulaangi.

¹⁰ Tangada dela ma gaa kae di hagamolooloo ne hagababa go God, geia e hagamolooloo i dana moomee, be God dela ne hagamolooloo i ana moomee.* ¹¹ Gidaadou hagamahi gii kae di hagamolooloo deela, gi dee doo hua dahi dangada be digau de hagamolu.

¹² Idimaa nnelekai a God le e mouli ge mogobuna, ge koia e gaa i tulumanu dauwa baahi lua, e tuu gi lodo loo gi di gowaa dela e heetugi ai di mouli mo di hagataalunga, gi di gowaa dela e duudagi ai nia dudaginga mo nia uga, ge e hagi aga di hiihai o di manawa tangada. ¹³ Dahi mee

* 4.5: Pisalem 95.11 * 4.7: Pisalem 95.7-8 * 4.8: Deuteronomy 31.7;

Joshua 22.4 * 4.10: Genesis 2.2

⁵ E hai gadoo be Christ: Christ digi bida hilihili aga Ia, bolo Ia e hagadabu e hai tangada aamua hai mee dabu. Go God dela ne hilihili aga a Mee, ga helekai, “Goe go dagu Dama daane,

dangi nei gei Au guu hai Tamana ni oou.”*

⁶ Gei mee gu helekai labelaa i lodo nia gowaa i golo boloo, “Goe gaa hai tangada hai mee dabu, gaa hana hua beelaa, gadoo be di ala o Melchizedek.”*

⁷ I lodo di mouli o Jesus nogo i henuailala, gei Mee nogo dalodalo gi nua mo ono halidangi gi God, dela e mee di daa Ia gi daha mo di made. Idimaa Mee e manawa hila gi lala ge e donu, God gu longono nia dangidangi a Maa.* ⁸ Ma e aha maa Mee Tama ni God, gei Mee guukabe di daudali mai dono hagaduadua. ⁹ Dono madagoaa ne aali, gei Mee guu hai taamada o di haga mouli dee odi ang gi digau huogodoo ala e daudali a Mee. ¹⁰ God gu haga menege aga a Mee belee hai tagi aamua hai mee dabu, i di ala hai mee dabu o Melchizedek.

Hudee hudua gi daha di hagadonu

¹¹ Gimaadou belee helekai nia hagadilinga mee e logo i di mee deenei, gei di maa e haingadaa di haga donu adu, idimaa, goodou e buna di donu ginai. ¹² Di madagoaa gu waalooloo belee hai goodou digau agoago, gei deesai, goodou e hiihai hua igolo gi tangada e aago goodou gi nia agoago matagidagi o nia helekai a God. Goodou belee gai nia meegai hamaaloo, gei goodou e gai hua nia meegai balabala.* ¹³ Tangada dela e miami i nia meegai balabala, la di tama hua igolo, e de iloo di tonu mo di hala. ¹⁴ Nia

* 5.5: Pisalem 2.7 * 5.6: Pisalem 110.4 * 5.7: Matthew 26.36-46;
Mark 14.32-42; Luke 22.39-46 * 5.12: 1 Corinthians 3.2

meegai hamaaloo le e humalia e gai go digau mmaadua, ala gu wouwou ge gu iloo di dugu geegee di huaidu mo di humalia.

6

¹ Gidaadou gi dugua nia agoago matagidagi o di Longo Humalia, gi kae ina nia agoago mmaadua. Gidaadou hagalee belee hagaduu labelaa di hagamau o di huli gi daha o nnegau balumee mo di hagadonu a God, ² di hagamau o di agoago di babdais, mo di dugu o nia lima, di hagamau o di haga mouli aga digau mmade, mo di hagi aga a God dela e hana hua beelaa. ³ Gidaadou gii hula gi mua. Deenei tadau mee gaa hai, maa God ga dumaalia.

⁴ Dehee di hai o digau ala ne kili gi daha nadau hagadonu, e loomoi labelaa e huli hoou? Digaula nogo i lodo di maalama o God, guu momi di wanga dehuia di langi, guu kae ngaadahi di Hagataalunga Dabu. ⁵ Digaula gu iloo mai nadau modongoohia humalia bolo nia helekai a God le e humalia, ge gu longoneia ginaadou nia mogobuna o di madagoaa dela ma ga hanimoi. ⁶ Malaa, digaula guu kili gi daha nadau hagadonu! E deemee loo di laha mai digaula e hagahuli hoou, idimaa, digaula guu ala be digau ne daudau haga lua di Tama a God, gu hagateete e i mua teenua.

⁷ God e hagahumalia nia gelegele ala e noho mau e doodoo ginai di uwa, ge e haga tomo aga nia huwa laagau, e hagahumalia digau ala ne ngalua gi nia maa. ⁸ Maa di gelegele ga haga tomo aga nia laagau dudua mo nia geinga huaidu, di gelegele le e balumee hua, gei God e haga halauwa di maa, di hagaodi gi muli gei di maa gaa dudu.*

* 6.8: Genesis 3.17-18

⁹ Madau ihoo hagaaloho, gimaadou e helehelekai beenei i madau hagamodou gagee hua adu gi goodou. Gimaadou gu iloo bolo goodou guu kae di maluagina koia humalia, dalia godou haga mouli. ¹⁰ God le e hai donu huoloo, Mee hagalee de langahia godou hegau humalia mo godou aloho i Mee, ilodo godou hagamaamaa ne wanga gi Mee, gei e wanga hua igolo gi godou duaahina dama Christ. ¹¹ Deenei di madau hiihai, bolo tangada nei mo tangada nei gi hagamahi, gaa dae loo gi di hagaodi, gei godou mee ala e hagamodou gagee ginai gaa mee di gila. ¹² Goodou hudee hagatoo, kawee i digau ala e hagamodou ge hagakono nadau manawa, gii kae di mee a God dela ne hagababa ang gi digaula.

Di hagababa donu a God

¹³ Di madagoaa God ne hai dana hagababa gi Abraham, Mee gu hagamodu bolo Ia ga haga gila aga dana hagababa dela ne hai. Di hagababa deenei ne hai i dono ingoo donu, idimaa, go Mee hua dela e aamua i hongo nia mee huogodoo. ¹⁴ Mee ne helekai, “Au e hagababa adu gi di goe, bolo Au ga haga maluagina goe, ga haga dogologowaahae do madawaawa.”*

¹⁵ Abraham gu hagakono dono manawa, guu kae di hagababa a God dela ne hai. ¹⁶ Tangada ma gaa hai dana hagamodu, le e hagamodu i di ingoo dela e aamua i deia, gei di hagamodu deenei la gaa mee di dugu nia lagalagamaaloo huogodoo. ¹⁷ Idimaa God gu hiihai e haga modongoohia aga gii donu humalia ang gi digau ala ga hai mee gi nia maluagina o dana hagababa bolo Ia hagalee huli dono manawa, malaa, Mee ne haga puni anga dana hagamodu gi dana hagababa. ¹⁸ Di hagababa

* 6.14: Genesis 22.16-17

mo di hagamodu le e deemee di huli, gei God e deemee di helekai tilikai i nia mee e lua aanei. Gidaadou ala guu noho baba i baahi o Mee, gidaadou gi maaloo, gi daahia hua di hagadagadagagee dela i tadau mua.¹⁹ Di hagadagadagagee deenei la go taula o tadau mouli. Taula deenei le e duuli ge hagadagadagagee ginai, e hana laa lodo di gahu duuli o di Hale Daumaha dela i di langi, gi lodo di gowaa dabuaahia dela e noho ai a God.*²⁰ Jesus guu hana gi golo i tadau mua, guu hai tagi aamua hai mee dabu gaa hana hua beelaa, i di ala hai mee dabu o Melchizedek.*

7

Melchizedek, tangada hai mee dabu

¹ Melchizedek la go di king o Salem, tangada hai mee dabu ni God Aamua Huoloo. Mee ne heetugi gi Abraham, ga hagahumalia a mee i di madagoaa Abraham ne hanimoi i tauwa, dela ne daaligi gii mmade nia king dogohaa.*² Abraham ne wanga gi Melchizedek dahi baahi e madangaholu o ana goloo ala ne kae i tauwa. (Di ingoo o Melchizedek dono hadinga e dahi e hai bolo “Di King o di Tonu”. Idimaa mee dela di king o Salem, malaa, dono ingoo e hai dono hadinga labelaa bolo “Di King o di Aumaalia”).*³ Nia maadua o maa digi modongoohia be koai, dono hagadili e hagalee modongoohia labelaa, gei dono laangi haanau e de iloo labelaa ngaadahi mo dono laangi dela ne made ai. Mee guu hai hua be tama ni God, guu hai tangada hai mee dabu, gaa hana hua beelaa.

⁴ Goodou gu gidee di aamua o maa. Tadau damana madua go Abraham guu wanga gi mee dahi

* 6.19: Leviticus 16.2 * 6.20: Pisalem 110.4 * 7.1: Genesis 14.17-20

* 7.2: Tadinga o di bida helekai Salem i telekai Hebrew la go “Di aumaalia”

baahi e madangaholu o ana goloo ala ne kae i tauwa. ⁵ Di hagadili o Levi, aalaa go digau hai mee dabu, gu helekai ginai nnaganoho bolo gi hagabudulia mai dahi baahi madangaholu o nia goloo digau Israel, ma eaha maa digaula nia duaahina ni digau Israel, di hagadili o Abraham labelaa.* ⁶ Gei Melchizedek hagalee di hagadili ni Levi, gei mee guukae dahi baahi madangaholu o nia goloo ne gaamai go Abraham, gu hagamaluagina Abraham, tangada dela ne kae di hagababa a God. ⁷ E donu bolo tangada dela e hagamaluagina dana dangada, la koia e amua i tangada dela ne kae di hagamaluagina. ⁸ Gei ibaahi digau o Levi, digau ala e mmademmade e hagabudu dahi baahi madangaholu. Gei ibaahi o Melchizedek, dahi baahi madangaholu le e hagabudu go tangada dela e mouli, be nnelekai di Beebaa Dabu. ⁹ Abraham ne dahi aga dahi baahi madangaholu gaa wanga gi Melchizedek, gei gidaadou e mee di helekai bolo Levi dela belee kae dahi baahi madangaholu, la gu dahi aga labelaa ana mee, ¹⁰ idimaa, Levi digi haanau i di madagoaa deela, dela hua nogo i lodo tuaidina dono damana madua go Abraham i di madagoaa o mee ne heetugi gi Melchizedek.

¹¹ Nnaganoho digau Israel ne hagamau mai i nnegau dabu o digau hai mee dabu o Levi. Maa nei boloo nnegau digau hai mee dabu ne donu ge dohu, gei tangada hai mee dabu e gila aga labelaa ai, mai di ala o Melchizedek hagalee mai di ala o Aaron. ¹² Maa nnegau o digau hai mee dabu la guu huli, gei nnaganoho le e hai gii huli labelaa. ¹³ Tadau Dagi dela e haga modongoohia go nnelekai aanei, la ni tuai madawaawa, deai tangada mai di madawaawaa o maa ne hai tangada hai mee dabu ai. ¹⁴ Gu modongoohia hagahumalia bolo Mee ne haanau mai

* [7.5: Numbers 18.21](#)

i di madawaawa o Judah, gei Moses digi helekai i di madawaawa deenei i dono madagoaa ne helekai i digau hai mee dabu.

Tuai dangada hai mee dabu e hai be Melchizedek

¹⁵ Di mee deenei la gu modongoochia hagahumalia, tuai dangada hai mee dabu gu gila aga, e hai gadoo be Melchizedek. ¹⁶ Mee hagalee ne hai tangada hai mee dabu mai nnaganoho dangada, gei ne hai go di mogobuna o di mouli dela e noho hua beelaa. ¹⁷ Idimaa di Beebaa Dabu e helekai,

“Goe gaa hai tangada hai mee dabu,
gaa hana hua beelaa,

i di ala hai mee dabu o Melchizedek.”*

¹⁸ Taganoho namua guu hudu gi daha, idimaa gu bagege, dono hadinga ai. ¹⁹ Idimaa Nnaganoho Moses gu deeme di hai nia mee gii donu hagatau. Gei dolomeenei di hagadagadagagee koia e humalia la gu gaamai, e laha mai gidaadou gi hoofoo gi God.

²⁰ Di hagadagadagagee deenei, gu haga puni ang gi ana hagamodu. Di hagamodu beenei ai i di madagoaa digau i golo ne hai digau hai mee dabu. ²¹ Jesus ne hai tangada hai mee dabu mai di hagamodu a God dela ne helekai gi mee,*

“Dimaadua guu hai dana hagamodu, ge hagalee huli loo dono manawa.
Goe gaa hai tangada hai mee dabu gaa hana hua beelaa.”

²² Di hagamodu deenei guu hai labelaa Jesus di hagamau o di hagababa dela koia e humalia.

²³ Di hai geegee labelaa i golo: digau hai mee dabu i golo la digau dogologo, idimaa, digaula guu mmade, e deeme di duudagi adu nadau hegau. ²⁴ Gei Jesus

* 7.17: Pisalem 110.4 * 7.21: Pisalem 110.4

le e mouli gaa hana hua beelaa, hagalee made. Ana hegau hai mee dabu le e hagalee higi gi tuai dangada. ²⁵ Dolomeenei mo nia madagoaa huogodoo, gei Mee e mee di haga mouli digau ala e loomoi gi God mai i de Ia, idimaa Mee e mouli gaa hana hua beelaa, e dalodalo gi God i digaula.

²⁶ Malaa, Jesus go tagi aamua hai mee dabu, dela e mee dana haga dohu tadau mee ala e manawa ai. Mee e dabuaahia huoloo, gei ono hala be ono huaidu ai. Mee guu dugu gi daha mo nia daangada huaidu, gu haga menege aga gi baahi i nua nia langi. ²⁷ Mee hagalee hai be digau aamua hai mee dabu ala i golo, mee hagalee hai dana tigidaumaha i nia laangi huogodoo e wwede ono huaidu i mua, ga nomuli go nia huaidu o nia dangada. Tigidaumaha a Maa ne hai, la ne hai hua haga dahi ang gi nia daangada huogodoo i dono madagoaa ne tigidaumaha Ia ang gi God.* ²⁸ Nnaganoho Moses ne hilihili aga nia daangada dee dohu e hai digau aamua hai mee dabu, gei di hagababa a God ne hai i di hagamodu la ne gila aga i muli nnaganoho, ne hilihili Tama belee hai gi aali gaa hana hua beelaa.

8

Jesus tadau dangada aamua hai mee dabu

¹ Deenei di maanadu dogomaalia i nia mee ala nogo helehelekai iei gidaadou, bolo gidaadou guu hai tadau dagi aamua hai mee dabu dela e noho i di baahi gau donu i di lohongo king i di langi,* ² e hai hegau i lodo di Gowaa Dabuaahia Huoloo, i lodo di hale laa donu dela ne hai go God, gei hagalee ne hai go nia daangada.

* 7.27: Leviticus 9.7 * 8.1: Pisalem 110.1

³ Nia dagi aamua hai mee dabu huogodoo la ne dongo belee hai nadau wanga dehuia mono tigidaumaha manu ang gi God. Malaa, tadau Dagi Aamua Hai mee dabu, e hai gii hai dana tigidaumaha labelaa. ⁴ Maa nei bolo Mee e noho i henuailala, gei Mee e deemee di hai tangada hai mee dabu, idimaa, ma digau hai mee dabu i golo ala e hai nia wanga dehuia ge e haihai nadau tigidaumaha gii hai be nnaganoho digau o Jew. ⁵ Nnegau ala e hai go digaula, la nia ada hua o nia mee ala e hai i di langi. E hai gadoo be Moses dela ne haga duu dana Hale laa Daumaha. God ne helekai gi mee,

“Mmada gi humalia,
heia nia mee huogodoo gii hai be di ada
dela ne haga modongoohia adu gi di goe
i tomo di gonduu.”*

⁶ Gei dolomeenei, Jesus guu kae di waawa hegau o tagi aamua hai mee dabu, dela koia e humalia i nia hegau digaula, gadoo be di hagababa dela ne hai go Mee i mehanga God mo ana daangada. Di hagababa deenei koia e humalia i di hagababa namua, idimaa, ne hai mai i nia hagababa o nia mee koia humalia. ⁷ Maa nei bolo di hagababa matagidagi la digi hala, di lua hagababa la digi heia, ⁸ idimaa, God gu gidee bolo ana dama la gu ihala, ga helekai,

“Di madagoaa e dau mai,
gei Au gaa hai dagu hagababa hoou
ang gi digau Israel mo digau Judah.

Aanei nnelekai Dimaadua ne hai.*

⁹ Di hagababa deenei la hagalee hai
be di hagababa dela ne hai ko Au
gi nadau maadua mmaadua

* 8.5: Exodus 25.40 * 8.8: Jeremiah 31.31-34

i di laangi ne kumi nia lima digaula,
ga dagi mai gi daha mo Egypt,
gei digaula digi daudalia di hagababa
dela ne hai gi digaula,
dela dagu mee ne de hiihai iei Au gi digaula.

¹⁰ Dolomeenei, deenei di hagababa
dela gaa hai ko Au gi digau Israel
i nia laangi ala ga lloomoi:
Au ga haga honu digaula gi agu haganoho,
gaa hihi nia maa gi lodo nia manawa digaula.
Digaula gaa hai nia dama ni aagu,
gei Au gaa hai di God ni digaula.

Aanei nnelekai Dimaadua ne hai
¹¹ Deai tangada e aago dono ihoo ai,
be e hagi anga gi tangada dono henua
boloo, 'Iloo Dimaadua.'
Nia daangada huogodoo,
digau lligi mo digau aamua,
ga iloo ginaadou Au.

¹² Gei Au ga dumaalia gi nia huaidu digaula,
ga haga de langahia nia hai hala digaula.”

¹³ Dono madagoaa ne helehelekai i di hagababa hoo, gei
God gaa hai di hagababa namua gii bobo, gei nia mee ala
gaa pobo gaa ngudu, e limalima hua di hagalee.

9

Daumaha i di langi mo i henuailala

¹ Di hagababa matagidagi la iai nia haganoho daumaha,
mo di gowaa hai daumaha henuailala. ² Di Hale laa
ne haga duu aga, di ruum mugi daha la di Gowaa Dabu
e dugu ai teebele mo di palaawaa tigidaumaha, mo di lo-
hongo malama.* ³ Di ruum mugi lodo dela i taalinga di

* 9.2: Exodus 26.1-30; 25.31-40; 25.23-30

ruum mugi daha, le e haga ingoo bolo di Gowaa Dabuaahia Huoloo.* ⁴ I lodo di gowaa dabuaahia deenei, la iai di gowaa goolo dudu tigidaumaha hagakala, mo Tebedebe o di Hagababa ne hai labelaa gi nia goolo. I lodo Tebedebe deenei la iai di ulu mee goolo dela e dugu ai nia 'manna' no lodo, mo togodogo Aaron dela e matilitili nia lau laagau, mo nia baahi hadu e lua ala ne hihhi ginai nnaganoho i dono gili.* ⁵ I hongo Tebedebe la iai nia ada manu nau bakau, di haga modongoohia bolo God le e noho i golo. Nau bakau le e gahu di gowaa dela e wwede ai nia huaidu. Malaa, dolomeenei la hagalee di madagoaa e haga donu nia mee hagalligi huogodoo.*

⁶ Deenei di hai o di haganohonoho nia mee digau hai mee dabu ala e ulu gi lodo di ruum mugi daha i nia laangi huogodoo, e hai nadau hegau.* ⁷ Tagi aamua hai mee dabu la hua dela e mee di ulu gi lodo di ruum mugi lodo. Mee e hana haga dahi i lodo di ngadau e dahi. Mee gaa hana le e kae ana dodo, e hai dana tigidaumaha ang gi God i ono hala, mo nia huaidu o nia daangada ala ne hai gei e de iloo ginaadou.* ⁸ Di Hagataalunga Dabu e agoago modongoohia mai nia haganohonoho aanei bolo di ala dela e hana gi di Gowaa Dabuaahia Huoloo le e hagalee mahuge maa di hale laa mugi daha le e duu hua igolo. ⁹ Deenei di ala mee dela e haga modongoohia aga di madagoaa dolomeenei. E haga modongoohia bolo nia wanga dehuia mo nia tigidaumaha manu ala e hai gi God, e deemee di haga madammaa lodo digau ala e daumaha beenei, ¹⁰ idimaa, nia tigidaumaha aanei e hai gi nia mee-gai mono mee inu, mo nia haihai haga madammaa. Malaa,

* 9.3: Exodus 26.31-33 * 9.4: Exodus 30.1-6; 25.10-16; 16.33; Numbers

17.8-10; Exodus 25.16; Deuteronomy 10.3-5 * 9.5: Exodus 25.18-22

* 9.6: Numbers 18.2-6 * 9.7: Leviticus 16.2-34

nia mee aanei huogodoo e haga modongoohia nia ada haganoho e hai hegau ai gaa dae loo gi di madagoaa a God ga haga duu aga dana hagatau hoou.

¹¹ Malaa, Christ gu hanimoi, e hai Tagi Aamua Hai mee dabu, ge haga maluagina nia mee huogodoo ala gu i tadau baahi. Di hale laa dela ne ulu iei Mee, hagalee hagatau ang gi dahi mee, e aamua, ge madamada huoloo i nia hale laa o henuailala huogodoo, ge hagalee ne hai go tangada, ge hagalee ni henuailala. ¹² Christ ne ulu hagadahi di hale laa deenei gilodo di Gowaa Dabuaahia Huoloo belee hai dana tigidaumaha. Digi kae ana dodo kuudi, be nia dodo kau, go ono dodo donu hua ne kae go Mee, belee hui gidaadou gi di mouli dee odi.

¹³ Nia dodo kuudi mono dodo kau, mono lehu damaa kau ne dudu, ga haga nonnono gi hongo nia daangada ala gu milimilia nadau mouli, e haga madammaa digaula.*

¹⁴ Malaa, nia dodo o Christ koia e mogobuna. Christ ne tigidaumaha dono huaidina madammaa ang gi God, mai di Hagataalunga Dabu dee odi. Nia dodo o Christ ga haga madammaa tadau lodo i nia daumaha balumee, gii mee ai gidaadou di hai hegau gi di God Mouli.

¹⁵ Malaa, deenei laa Christ guu hai mee gi tegau dela e hagahumalia di hagababa hoou. Digau huogodoo ala ne gahigahi mai go God, e kae di maluagina dee odi dela gu hagababa ang gi digaula. Di mee deenei guu mee hua di hai, idimaa, Christ guu made, guu wwede nia huaidu ala ne hai go digaula i di madagoaa di hagababa namua nogo hai hegau.

¹⁶ Maa di boloagi ga i golo, e hai gi hagamodongoohia bolo e donu bolo tangada dana boloagi la guu made.

¹⁷ Maa tangada dana boloagi le e mouli hua igolo,

* 9.13: Leviticus 16.15-16; Numbers 19.9,17-19

di boloagi e hagalee mogobuna. Di boloagi le e mogobuna hua i muli tangada dana boloagi la guu made. ¹⁸ Dela tadinga di gila o di hagababa matagidagi, le e mogobuna hua mai nia dodo. ¹⁹ Matagidagi, gei Moses ne dau gi digaula nia haganoho huogodoo ala ilodo di Beebaa Haganoho, ga nomuli, gei mee ga hai hegau gi di lau laagau hisop mo nia huluhulu siibi ala e mmee, ga daalo gi lodo nia dodo kau mo kuudi, ga unugi gi nia wai, ga dahi aga, ga hagatulutulu di Beebaa Haganoho mo nia daangada huogodoo.* ²⁰ Gei mee ga helekai, “Aanei nia dodo ala e hagamodongoohia di hagababa dela ne helekai ai God bolo goodou gi daudalia le e donu.” ²¹ Mee ne hagatulu labelaa di Hale laa Daumaha mono goloo huogodoo ala e hai hegau no lodo gi nia dodo aanei.* ²² Nnaganoho e haga modongoohia bolo nia mee huogodoo le e haga madammaa gi nia dodo, gei di huaidu le e wwede gi daha gi nia dodo.*

Tigidaumaha a Christ e daa gi daha nia hala

²³ Nia mee aanei la nia ada mee o nia mee donu ala i di langi, la ne hai gi haga madammaa beelaa. Gei nia mee donu o di langi e haga madammaa gi nia tigidaumaha koia e donu ge humalia. ²⁴ Idimaa, Christ la digi ulu gi lodo di Gowaa Dabu dela ne hai go tangada, di mee deenei la di ada mee hua ni di mee dela e donu. Mee ne ulu i di langi i di gowaa dela e noho iei Mee dolomeenei i baahi o God, e hagamaamaa gidaadou. ²⁵ Tagi aamua hai mee dabu o Jew e ulu gi lodo di Gowaa Dabuaahia Huoloo i nia ngadau huogodoo, e kae nia dodo manu, gei Christ digi ulu nnolongo e logo belee tigidaumaha

* 9.19: Exodus 24.6-8 * 9.21: Leviticus 8.15 * 9.22: Leviticus 17.11

Ia. ²⁶ Maa nei bolo ne hai beenei, gei Mee ne belee hagaduadua i nia holongo e logo mai taamada henuailala. Gei deeai, Mee ne hanimoi hua haga dahi, hoo hoo gi di hagaodi gi muli o nia hagadili o nia madawaawa ala nogo hagadau mai i mua. Mee ne hanimoi belee tigidaumaha Ia, e daa gi daha nia huaidu. ²⁷ Ma guu lawa di haga noho bolo tangada le e made hua haga dahi, ga nomuli, gaa kae di hagi aga i baahi o God. ²⁸ E hai gadoo be Christ dela ne tigidaumaha hua Ia haga dahi belee wwede ai nia huaidu o nia daangada dogologowaahē. Gaa lawa, ga hanimoi labelaa haga lua, hagalee wwede labelaa nia huaidu, e haga mouli digau ala e talitali a Mee.*

10

¹ Nia haganoho digau o Jew la nia ada mee hua, hagalee go nia mee donu. Ma go nia ada mee hua ala e haga modongoohia nia mee humalia ala galloomoi maalia. Gei nia tigidaumaha le e tataanga i nia ngadau huogodoo gaa hana hua beelaa. Malaa, nia haganoho mai nia tigidaumaha le e dohu dogomaalia behee nia daangada ala e loomoi gi God? ² Maa nei bolo e donu bolo di haidaumaha o nia daangada anggi God le e hagamadammaa nadau ihala, digaula gu nadau ihala ai, gei nia tigidaumaha la gu hagalee hai. ³ Gei deeai, tigidaumaha dela e haihai i lodo nia ngadau huogodoo, di mee e haga langahia nadau huaidu ala ne haihai. ⁴ Idimaa, nia dodo kau mo nia dodo kuudi, e deemee di daa gi daha nia huaidu o nia daangada.

⁵ Malaa, deenei tadinga a Christ i mua dono madagoaa ne hanimoi gi henuailala, Mee ne helekai gi God boloo: “Goe hagalee hiihai gi tigidaumaha mo di wanga dehuia dela e hai gi nia manu,

* 9.28: [Isaiah 53.12](#)

gei Goe ne hagatogomaalia tuaidina mai gi di Au.*

⁶ Goe e hagalee tene gi nia wanga dehuia manu ala e dudu haga dogomaalia i hongo di gowaa dudu tigidaumaha, belee wwede nia huaidu.

⁷ Gei Au ga helekai gi Mee:

‘Deenei Au, Meenei God, Au belee hai do manawa, gii hai be nnelekai ala guu lawa di hihi gi lodo di Beebaa Haganoho.’ ”

⁸ Matagidagi, gei Mee ne helekai boloo, “Goe hagalee hiihai be e manawa tene gi tigidaumaha mo di wanga dehuia dela ne hai gi nia manu ala e dutudu i hongo di gowaa dudu tigidaumaha belee wwede nia huaidu.”

Mee ne helekai nia mee beenei, ma e aha maa nia tigi-daumaha huogodoo le e hai gii hai be nnaganoho. ⁹ Mee ne helekai nomuli,

“Deenei Au, Meenei God, Au belee hai do manawa.”

Malaa, God guu kili gi daha nia tigidaumaha namua, gu haga noho aga tigidaumaha hooou a Christ gi nadau lohongo. ¹⁰ Idimaa Jesus Christ gu haga gila aga di manawa o God, gei gidaadou huogodoo gu madammaa gi daha mo tadau huaidu, idimaa, Mee gu tigidaumaha dono huaidina hagadahi mai gi gidaadou huogodoo.

¹¹ Digau hai mee dabu o Jew huogodoo e hai hegau i nia laangi huogodoo, e hai nadau tigidaumaha lahua i nia holongo e logo, malaa, nia tigidaumaha digaula e deemee loo di wwede nia huaidu.*

* 10.5: Pisalem 40.6-8

* 10.11: Exodus 29.38



¹² Christ ne tigidaumaha haga dahi hua, tigidaumaha deenei le e mogobuna di wwede nia huaidu, nomuli gei Mee guu noho i di baahi gau donu o God.* ¹³ Deelaa di gowaa a Mee e talitali dolomeenei, gaa dae loo gi di madagoaa God gaa dugu ono hagadaumee gi lala gadoo be di llanga ono babaawae. ¹⁴ Tigidaumaha deenei ne hai hua haga dahi, dela ne hai digaula gii dohu dogomaalia gaa hana hua beelaa, go digau ala e haga madammaa gi daha nadau huaidu.

¹⁵ Di Hagataalunga Dabu gu haga modongoohia mai gi gidaadou nia mee aanei, Mee ne helekai matagidagi boloo,

¹⁶ “Di Maadua e helekai,
 ‘Deenei di hagababa dela gaa hai ko Au
 gi digaula i nia laangi ala ga loomoi,
 gei Au ga haga honu digaula gi agu haganoho,
 gaa dugu nia maa gi lodo nia manawa digaula,
 gaa hihi nia maa gi lodo nadau maanadu.’ ”*

¹⁷ Mee ne helekai labelaa boloo,
 “Au ga haga de langahia nia hagadilinga huaidu
 ala nogo hai go digaula.”*

¹⁸ Di madagoaa nia huaidu aanei gu maahede, gei tigi-
 daumaha dela belee wwede nia huaidu la hagalee hai
 labelaa.

Gidaadou gi mmaanega adu gi God

¹⁹ Ogu ihoo hagaaloho, gidaadou gu dagaloaha di ulu
 gi lodo di Gowaa Dabuaahia Huoloo mai di made o Jesus.

²⁰ Christ gu huge mai gi gidaadou dahi ala hoou ge mouli,
 e moe adu, gu ihaa i baahi i golo di gahu duuli di gowaa
 deelaa, guu dau adu gi di Gowaa Dabuaahia Huoloo, di
 ala deenei la go dono huaidina. ²¹ Malaa gidaadou gu iai
 tadau Dangada hai mee dabu aamua, e dagi di hale o God.

* 10.12: Pisalem 110.1 * 10.16: Jeremiah 31.33 * 10.17: Jeremiah 31.34

²² Deenei laa, gidaadou gi mmaanenge adu gi God i di manawa madammaa mo di hagadonu e donu. Tadau manawa daamaha mo tadau huaidina huaidu guu lawa di gaugau gi nia wai madammaa.* ²³ Gidaadou gi daahia gii mau tadau hagadagadagagee dela nogo haga modongoohia go gidaadou, idimaa, gidaadou e mee di hagadagadagagee gi God, e dadaahi dana hagababa. ²⁴ Gidaadou gi hagadau hagamaamaa i di haga modongoohia aga tadau aloho, mo tadau hangaahai humalia huogodoo. ²⁵ Gidaadou gi hudee dugua tadau hai dagadagabuli, be di hai o hunu daangada. Gei gidaadou gi hagamahi hagamaaloo ina aga tangada nei mo tangada nei, idimaa, goodou gu iloo bolo di Laangi o Tagi la gu hoo hoo mai.

²⁶ Maa gidaadou gaa unu hua i lodo nia huaidu i muli tadau maalama gi nia agoago ala e donu, gu deai dahi tigidaumaha labelaa e mee di haga madammaa gidaadou gi daha mo nia huaidu ai, ²⁷ di mee i golo, go gidaadou e talitali mmaadagu di hagi aga mo nia mahi o di ahi dela gaa dudu digau ala e hai baahi ang gi God.* ²⁸ Maa tangada ga de hagalongo gi Nnaganoho Moses, ia e daaligi gii made maa ia gu hagi aga i nia hagadootonu o nia daangada dogolua be dogodolu bolo mee gu ihala, geia e deemee di dumaalia ginai.* ²⁹ Malaa goodou e hagamaanadu bolo aha gi tangada dela e haga balumee Tama a God? Tangada deela, e hagahuaidu nia dodo o di hagababa hoo, ala ne haga madammaa ia, ge e haganneennee di Hagataalunga mo dono dumaalia. Tangada beenei le e hagaduadua damanaiee!* ³⁰ Gidaadou gu iloo be di maa ko ai ne helekai,
 “Au ga hai baahi gi tongaadahi

* 10.22: Leviticus 8.30; Ezekiel 36.25 * 10.27: Isaiah 26.11 * 10.28:

Deuteronomy 17.6; 19.15 * 10.29: Exodus 24.8

gaa hui gi muli,”
 gei Mee gu helekai labelaa,
 “Dimaadua ga hagi aga ana daangada.”*

³¹ E hagamadagudagu dangada huoloo maa tangada
 gaa doo gi lodo nia lima o di God Mouli!

³² Goodou gi langahia godou hangaahai i lodo nia laangi
 ne too gi daha. I lodo nia laangi aalaa, i muli di maalama
 a God ne haga maalama goodou, gei nia haingadaa e logo
 gu tale adu gi goodou, gei goodou gu mau dangihi i lodo di
 madagoaa haingadaa, digi magedaa. ³³ Hunu madagoaa
 nia daangada e haga balumee goodou i mua teenua, gei
 e haga huaidu goodou. Hunu madagoaa gei goodou
 gu hiihai e buni anga gi digau ala guu kae nia hagdilinga
 haguadua beenei. ³⁴ Goodou guu kae di haguadua o
 digau lawalawa. Di madagoaa godou maluagina ne daa
 gi daha mo goodou, gei goodou gu hagakono i di manawa
 tene, i goodou gu iloo bolo goodou gu hai mee gi nia mee
 koia e humalia gaa hana hua beelaa. ³⁵ Hudee diagia
 godou manawa maaloo, idimaa, godou manawa maaloo
 la iai dono hui damana. ³⁶ Goodou e hai loo gi hagakono
 godou manawa, gei goodou gaa mee di haga gila aga di
 manawa o God, ga hai mee gi ana mee ala guu lawa dana
 hagababa adu gi goodou. ³⁷ Di Beebaa Dabu e helekai
 boloo,

“Di madagoaa hua dulii i golo,
 gei Mee dela e hanimoi, la ga dau mai,
 Mee hagalee duai.*

³⁸ Agu daangada ala e donu
 ga hagadonu ga mouli.
 Maa tangada i digaula gaa huli gi daha
 mo dono hagadonu,

* 10.30: Deuteronomy 32.35,36 * 10.37: Habakkuk 2.3-4

Au hagalee loo e tene ginai.”

³⁹ Gidaadou hudee huli gi daha mo tadau hagadonu, gi dee nngala. Gidaadou gu iai tadau hagadonu, gei gu hagamouli.

11

Di hagadonu

¹ Di hagadonu le e iloo modongoohia nia mee ala e hagadagadagee ginai, ge e modongoohia nia mee e de gidee. ² Di hagadonu dela nogo daudali go tadau maadua mmaadua guu hai digaula gii kila humalia i baahi o God.

³ Di hagadonu dela ga iloo gidaadou bolo di langi mo henuailala la ne hai gi nia helekai a God. Malaa, nia mee ala e gidee gidaadou, la ne hai mai i nia mee ala e de gidee.*

⁴ Di hagadonu dela ne hai Abel gi tigidaumaha humalia i tigidaumaha a Cain. Abel ne hagadonu, gei mee guu gila humalia, guu donu idimaa God gu hila anga gi dana tigi-daumaha. Mai i di hagadonu o maa, Abel e helehelekai hua igolo, ma e aha maa mee guu made.*

⁵ Di hagadonu dela ne hai Enoch gi hagalee made, gei guu lahi mouli gi baahi o God, gei tangada ne gidee a mee ai, idimaa, go God dela ne lahi a mee. Di Beebaa Dabu e helekai bolo i mua dono lahi gi di langi, Enoch nogo haga tenetene a God.*

⁶ Tangada dono hagadonu ai, le e deemee di haga tenetene a God. Tangada dela e hana gi God, geia gi hagadonu bolo God la i golo, e haga humalia digau ala e halahala Ia.

* 11.3: Genesis 1.1; Pisalem 33.6,9; John 1.3

* 11.4: Genesis 4.3-10

* 11.5: Genesis 5.21-24

⁷ Di hagadonu dela ne hai Noah gi hagalongo gi nnelekai a God i nia mee ala ga lloomoi, gei digi mmada ginai. Mee ne hagalongo gi God, gaa hau dana waga belee haga dagaloaha ia mo dono beneinei. Deenei la go toloo o henuailala, gei Noah guu donu i mua o God mai i dono hagadonu.*

⁸ Di hagadonu dela ne hai Abraham gi daudali nnelekai a God bolo gii hana gi tenuta dela gu hagababa gi mee. Mee ga hagatanga i dono henua donu, gei mee e de iloo tenuta dela e hana ginai eia.* ⁹ Di hagadonu o maa dela gaa noho iei mee be tangada hua gee i lodo tenuta God dela ne hagababa ang gi mee, i lodo nia hale laa, gadoo be Isaac mo Jacob ala ne kae di hagababa la hua mai baahi o God.* ¹⁰ Idimaa, Abraham e noho ge talitali di waahale dela ga haga duu go God, dono hagamau le e noho hua beelaa, dono hagaodi ai.

¹¹ Di hagadonu dela ne hai Abraham gii hai tamana, gei mee gu madumadua huoloo, gei dono lodo go Sarah e dee huwa. Abraham gu hagadonu bolo God e haga gila dana hagababa.* ¹² Ma e aha maa Abraham gu hoohoo gaa made, gei di hagadili o maa le e daamada mai tangada hua e dahi, ga haga dili ga dogologowaahae, gadoo be nia heduu ala i di gili di langi, mo nia gelegele ala i tongotai e deemee di dau.*

¹³ Nia daangada huogodoo ala ne hagadonu beenei, la guu mmade, gei digi kae nia mee a God ala ne hagababa ang gi digaula. Digaula gu gidee mai haga mogowaa, gu tenetene hua gi nia mee ala ne hagababa. Gei gu haga modongoohia bolo ginaadou digau hua mai

* 11.7: Genesis 6.13-22 * 11.8: Genesis 12.1-5 * 11.9: Genesis 35.27

* 11.11: Genesis 18.11-14; 21.2 * 11.12: Genesis 15.5; 22.17; 32.12

i daha, hagalee digau ni henuailala.* ¹⁴ Nia hagadilinga daangada ala e helehelekai beenei, e haga modongoohia bolo digaula e halahala di nadau henua donu. ¹⁵ Digaula digi maanadua tenua dela ne hagatanga ai ginaadou. Maa nei bolo digaula ne maanadu beenei, gei digaula guu hula gi muli. ¹⁶ Gei deesai! Digaula e halahala hua tenua dela e kaedahi e humalia, dela i di langi. Gei God e hagalee langaadia i digau ala gaa dugu eia bolo di God ni ginaadou, idimaa, God gu hagatogomaalia di waahale e noho ai digaula.

¹⁷ Di hagadonu dela ne hai Abraham gi tigidaumaha dana dama daane go Isaac i di madagoaa God ne hagamada a mee. Abraham dela ne hai ginai di hagababa a God, gei mee gu togomaalia ga tigidaumaha dana dama daane hua e dahi.* ¹⁸ God gu helekai gi mee, “O hagadili ala ne hagababa ko Au adu gi di goe le e daamada mai i Isaac.”*

¹⁹ Abraham gu iloo ia, bolo God le e mee hua di haga mouli aga Isaac mai i di made. Gei gidaadou e mee hua di helekai bolo Abraham guu daa a Isaac mai i di made.

²⁰ Di hagadonu dela ne hai Isaac gii hai dana hagababa gi Jacob mo Esau i di maluagina dela ga dau mai.*

²¹ Di hagadonu dela ne hai Jacob gi haga maluagina nia dama daane Joseph i mua dono made. Mee ne togo gi hongo dono dogodogo, gaa bala gi mua ga daumaha.*

²² Di hagadonu dela ne hai Joseph gi haga modongoohia aga i mua dono made di hagatanga digau Israel gi daha mo Egypt. Gei mee

* 11.13: Genesis 23.4; 1 Kronikel 29.15; Pisalem 39.12 * 11.17: Genesis

22.1-14 * 11.18: Genesis 21.12 * 11.20: Genesis 27.27-29,39-40

* 11.21: Genesis 47.31; 48.1-20

ne haga modongoohia labelaa di nadau benebene dono huaidina i muli dono made.*

²³ Di hagadonu dela ne hai tamana mo tinana Moses gii dugu hagammuni a Moses i nia malama e dolu i muli dono haanau. Meemaa ne mmada gi di tama dela e madamada, gei meemaa gu hagalee mmaadagu nia haganoho di king.*

²⁴ Di hagadonu dela ne hai Moses gi de hiihai i dono madagoaa ne madua, bolo digaula gi hudee haga waalanga ia bolo di tama ni tama ahina di king o Egypt.* ²⁵ Mee hagalee hiihai e tene gi di huaidu dela e hai i di madagoaa bodobodo, gei mee e hiihai e hagaduadua madalia nia dama a God. ²⁶ Mee e daumada hua di hui dela e hanimoi i ono mua, idimaa mee e iloo bolo di hagaduadua kono anggi di Mesaia le koia e maluagina mogowaa i nia maluagina hagalabagau huogodoo o Egypt.

²⁷ Di hagadonu dela ne hai Moses gi hagatanga Egypt, gei mee hagalee madagu i di hagawelewele o di king. Gu hai be mee e gidee di God dela e deemee di mmada ginai, gei mee digi hana gi muli. ²⁸ Di hagadonu dela ne hidi iei mee ga haganoho di Pasoobaa, ga helekai bolo nia dodo gi hunua gi hongo nia bontai nia hale o digau Israel, bolo tangada di langi o di made ga gidee ia, ga hagalee daaligi nia ulu mmaadua digau Israel.*

²⁹ Di hagadonu dela ne hai digau Israel gii mee di hula laa lodo Tai Mmee, gei di maa guu bagu be hongo henua. Digau o Egypt ga hagamada belee hula, gei digaula gu mmaalemu.*

* 11.22: [Genesis 50.24-25](#); [Exodus 13.19](#) * 11.23: [Exodus 2.2](#); [Exodus 1.22](#)
 * 11.24: [Exodus 2.10-12](#) * 11.28: [Exodus 12.21-30](#) * 11.29: [Exodus 14.21-31](#)

³⁰ Di hagadonu dela ne hidi ai nia abaaba di waahale Jericho ga mooho, i muli digau Israel ne haganiga di waahale deenei i nia laangi e hidu.*

³¹ Di hagadonu dela ne hidi ai di ahina mouli huaidu go Rahab ga dagaloaha, idimaa, mee ne benebene digau hagadina hagammuni, gei mee digi dau madalia digau de hagalongo ala ne daaligi.*

³² Au belee helekai hua igolo? Dogu madagoaa ai, e helekai i Gideon, Barak, Samson, Jephthah, David, Samuel, mo nia soukohp.* ³³ Mai di hagadonu dela ne hidi ai digaula ga heebagi gi nia henua huogodoo ala i golo, ga maaloo. Digaula guu hai nia mee ala e donu, guukae nia hagababa a God anggi digaula. Digaula guu pono nia ngudu nia laion.* ³⁴ Digaula gu diinai nia ahi maaloo, gu hagalee tale gi taaligi hulumanu dauwa. Digaula guu lodo paagege, gei gu maaloo. Digaula e maaloo i lodo tauwa, gu daaligi digau dauwa tuadimee.* ³⁵ Mai i di hagadonu, nia ahina guu lahi nadau gau mmade ne mouli aga labelaa gi daha mo di made.

Hunu daangada hagalee hiihai e haga dagaloaha, digaula guu mmade i di hagaduadua, bolo gi mouli aga ginaadou i di mouli mada humalia.* ³⁶ Hunu ginaadou ne haga mmaemmae ga haga mamaawa, ge hunu gau ne lawalawa, ne kili gi lodo di hale galabudi.* ³⁷ Hunu gau ne dilidili, hunu gau ne duuduu gi nia dowaa, hunu gau ne daaligi gi nnulumanu dauwa, hunu gau ne haga ulu gi nia gili manu siibi mono gili manu kuudi. Hunu gau

* 11.30: Joshua 6.12-21 * 11.31: Joshua 2.1-21; 6.22-25 * 11.32: Gabunga 6.11-8.32; 4.6-5.31; 13.2-16.31; 11.1-12.7; 1 Samuel 16.1-1 Kings 2.11; 1 Samuel 1.1-25.1 * 11.33: Daniel 6.1-27 * 11.34: Daniel 3.1-30 * 11.35: 1 Kings 17.17-24; 2 Kings 4.25-37 * 11.36: 1 Kings 22.26-27; 2 Kronikel 18.25-26; Jeremiah 20.2; 37.15; 38.6

ne hai gi hagaloale, ge e hagaduadua hagahuaidu, ge hagalee benebene haga humalia.* ³⁸ Henuailala la hagalee humalia gi digaula. Digaula guu hula, gu heehee hua i lodo nia anggowa mo i hongo nia gonduu, ge noho i lodo nia bongoo hadugalaa mono bongoo i lodo di gelegele.

³⁹ Malaa, nia daangada aanei huogodoo gu modongoohia bolo ginaadou digau humalia mai i nadau hagadonu. Gei digaula la digi kae di mee a God dela ne hagababa anga, ⁴⁰ idimaa God guu hai dana hagatau dela koia e humalia mai gi gidaadou, bolo digaula la gi madalia gidaadou, gei digaula gaa dohu dogomaalia.

12

Tadau Damana go God

¹ Mai gi gidaadou, iai digau hagadootonu dogologo deenei i tadau baahi, malaa, gidaadou gi kilia gi daha nia haga deaadee mo nia huaidu ala e lawalawa gidaadou. Gidaadou gii hai digau e llele hagamaha i di hoiaa i tadau mua. ² Gidaadou gi daumada ina hua a Jesus, go Mee dela go taamada mo di hagaodi o tadau hagadonu. Mee e de hei eia dono hagaduadua i di loobuu. Idimaa di tene dela e talitali a Mee, gei Mee e de hei eia dono haga langaadia i dono made i di loobuu. Dolomeenei gei Mee guu noho i di baahi dau donu di lohongo king o God.

³ Goodou gi hagamamaanadu ina dono hai ne hagaduadua ai, mo dono hagakono dono manawa i nia haganneenee digau huaidu! Malaa, hudee manawa paagege ge hudee kilia gi daha godou hagadonu. ⁴ I di godou hai baahi gi di huaidu, gei goodou digi tale gi di made. ⁵ Goodou gu de langahia nnelekai hagamaaloo a

* 11.37: 2 Kronikel 24.21

God ne hai adu gi goodou, be tangada e helekai gi ana dama? Mee ne helekai boloo,
 “Dagu dama daane,
 hagalongo ang gi Dimaadua ma gaa hai goe gii donu,
 hudee manawa bagege gi ana aago goe.*

⁶ Idimaa, Dimaadua e haga donu digau huogodoo ala e aloho ai, gei e hagaduadua nia daangada huogodoo ala guu hai ana dama.”

⁷ Goodou hagakono i di hagaduadua be di godou hagaduadua mai godou damana. Di godou hagaduadua e haga modongoochia bolo God guu hai goodou nia dama ni aana. Ma di tama i golo e hagalee daaligi go dono damana? ⁸ Maa goodou digi kae di hagaduadua be ana dama huogodoo, malaa, goodou hagalee nia dama donu ni Mee. ⁹ Di hai o tadau damana henuailala e hagaduadua gidaadou, gei gidaadou e hagalabagau digaula. E hai behe? Ma hagalee koia e humalia maa gidaadou gaa dugu gidaadou gi Tamana hagataalunga, ga mouli? ¹⁰ Tadau damana henuailala e hagaduadua gidaadou i di madagoaa bodobodo, di mee e donu ginai digaula e hai. Gei God e hagaduadua gidaadou belee hagahumalia gidaadou, bolo gii dabu gidaadou be Ia dela e dabu. ¹¹ Di madagoaa gidaadou ma ga hagaduadua, gei gidaadou e hai bolo ma di mee e hai gidaadou gi manawa gee, hagalee tenetene. Di madagoaa maalia, ginaadou ala nogo aago gi di hagaduadua beelaa, gaa hagi di hui di aumaalia o di mouli e donu.

Nia agoago mono haga iloo

¹² Malaa, dahi aga ina godou lima ala gu maanu, haga maaloo ina aga godou duli ala e bolebole.* ¹³ Taele

* 12.5: Job 5.17; Agoago Podo 3.11-12

* 12.12: Isaiah 35.3

i hongo nia ala huudonu, gii hili nia wae ala e deemee di heehee gi haele.*

¹⁴ Hagamada gii noho i di aumaalia i baahi nia daangada huogodoo, gi mouli i di mouli dela e dabu, idimaa, tangada e mee di mmada gi Tagi ai maa ia hagalee dabu i lodo dono mouli. ¹⁵ Gii pula i goodou, gi dee huli gi daha mo tumaalia o God. Hudee hai be di laagau mmala, dela e tomo aga, e hai nia haingadaa e logo i dono poisin.* ¹⁶ Goodou hudee mouli milimilia, ge hudee de hiihai gi God be di hai o Esau, dela ne hui gi daha ono mogobuna dagi ulu madua gi di pileedi meegai.* ¹⁷ Goodou gu iloo di mee dela ne hai nomuli, mee gu hiihai e kae ono maluagina mai baahi dono damana, gei gu deemee, idimaa mee digi gidee di ala dela e huli dana mee dela ne hai, ma e aha mee nogo halidangi i dana halahala.*

¹⁸ Goodou digi lloomoi be digau Israel gi di Gonduu Sinai, gi longono goodou di ulaula, mo di bouli dongoeho mo dono madangi maaloo,* ¹⁹ mo di lee damana o di ‘trumpet’ mo di longono di lee gu gila aga. Di madagoaa nia daangada ne longono di lee deela, gei digaula gu tangitangi hagamahi, bolo gi de longono labela di lee deenei, ²⁰ idimaa, digaula e deemee di kae nia helekai ala e hai boloo, “Di manu ma gaa tale gi di gonduu deenei, le e dilidili gii made.”* ²¹ Di ada deenei koia e hagamadagudagu dangada, ne hidi ai Moses ga helekai, “Au gu madagu huoloo, ge gu bolebole!”*

²² Malaa, goodou ne loomoi gi di Gonduu Zion, di waa-hale o di God Mouli, go Jerusalem dela i di langi, e honu

* 12.13: Agoago Podo 4.26 * 12.15: Deuteronomy 29.18 * 12.16:

Genesis 25.29-34 * 12.17: Genesis 27.30-40 * 12.18: Exodus 19.16-22; 20.18-21; Deuteronomy 4.11-12; 5.22-27 * 12.20: Exodus 19.12-13

* 12.21: Deuteronomy 9.19

digau di langi dogologowaahē. ²³ Goodou gu lloomoi gi di hagabuni hagatenetene o nia ulu mmaadua dama daane a God, ala guulawa di hihi nadau ingoo i di langi. Goodou gu lloomoi gi baahi o God, tangada gabunga o nia daangada huogodoo, gi baahi labelaa nia hagataalunga daangada humalia ne hai gii dohu hagatau. ²⁴ Goodou gu lloomoi gi Jesus dela ne haga noho di hagababa hoou, gu lloomoi labelaa gi nia dodo ala ne llingi anga, ala e hagababa nia mee koia e humalia i nia dodo o Abel.*

²⁵ Deenei laa, goodou nei gi de haga balumee hua Tangada dela e helehelekai adu gi goodou. Idimaa, digau ala nogo haga balumee tangada dela nogo hagonudonu nnelekai a God i henuailala, digaula digi dagaloaha. Malaa, gei gidaadou ga dagaloaha beheē maa gidaadou ga haga balumee Tangada dela e helehelekai mai i di langi?*" ²⁶ Dono lee gu haga ngalua henuailala i di madagoaa deela. Dolomeenei ge Ia guu hai dana hagababa boloo,
 "Au gaa hai labelaa di haga ngalua deenei,
 hagalee go henuailala la hua,
 mo di langi i nua labelaa."*

²⁷ Nnelekai bolo "Au gaa hai labelaa" e haga modongoohia madammaa bolo nia mee ala ne hai ga ngalungalua ga hagalee, gei nia mee ala e deemee di ngalungalua gaa dugu hua igolo.

²⁸ Gidaadou gi danggee i gidaadou guu kae tēua dela e deemee di ngalungalua. Gidaadou gi hagaamuina God, mo di daumaha i di ala dela e hiihai ginai Mee i di haga-madagudia, ²⁹ idimaa, tadau God lago di ahi dela e dudu gii wele.*

* 12.24: Genesis 4.10 * 12.25: Exodus 20.22 * 12.26: Haggai 2.6

* 12.29: Deuteronomy 4.24

13

Di haga tenetene di manawa o God

¹ Gi daahia hua di godou hagadau aaloho be nia dama a Christ. ² Gi langahia gi benebene ina digau mai i daha gi godou hale, hunu daangada ne hai beelaa, gei digaula ne benebene digau di langi, gei digi iloo bolo ma digau di langi.* ³ Gi langahia digau ala i lodo nia hale galabudi. Gi maanadua bolo goodou e madalia digaula. Gi langahia labelaa digau ala e hagaduadua kono. Gi maanadua bolo goodou e duadua be digaula.

⁴ Goodou huogodoo e hai loo gi hagabalagau tabuaahia o taga hai lodo. Nia daane mo nia ahina hai lodo gi hagadaubuni, hagadau hagalaamua. God le e hagi aga tangada mouli be di manu ge huaidu.

⁵ Goodou gi hudee aloho i nia bahihadu, gii dohu hua gi godou mee ala gu i golo, idimaa, God gu helekai, “Au hagalee diiagi goe, be e hudu goe gi daha.”*

⁶ Gidaadou la gi maaloo i tadau helekai, “Dimaadua la go dogu hagamaamaa, au hagalee madagu. Ma di aha dela e mee di hai go tangada mai gi di au?”*

⁷ Gi langahia digau agoago namua ala nogo hagi ngudu adu gi goodou nnelekai a God. Gi hagabaubau ina nia hanga mouli digaula, mo nadau mmade, goodou gi daudalia nadau hagadonu. ⁸ Jesus Christ e hai hua be di mee e dahi anaahi, dangi nei, gaa hana hua beelaa.

* 13.2: Genesis 18.1-8; 19.1-3

* 13.5: Deuteronomy 31.6,8; Joshua 1.5

* 13.6: Pisalem 118.6

⁹ Hudee dumaalia anga gi nia agoago hua gee tilikai gi dagi ina goodou gi daha mo di ala dela e donu. Di mee dela e humalia adu gi godou hagataalunga, daudalia hua tumaalia o God, hagalee go nia haganoho o nia meegai. Idimaa, tangada dela ma ga hagalongo gi nia haganoho aanei, deai dono humalia e kae ai.

¹⁰ Digau hai mee dabu o Jew ala e ngalua i lodo di Hale Daumaha, nadau donu ai di gai tigidaumaha dela e hai i hongo tadau gowaa dudu tigidaumaha. ¹¹ Tagi aamua hai mee dabu o Jew e kae nia dodo manu gi lodo di Gowaa Dabuaahia Huoloo belee hai tigidaumaha, e wwede nia huaidu, gei nia huaidina o nia manu le e dudu i tua di waahale.* ¹² Deelaa tadinga Jesus ne made labelaa i tua di waahale, belee haga madamma nia huaidu o nia daan-gada gi ono dodo donu.



Nia loobuu i tua di waahale

* 13.11: Leviticus 16.27

¹³ Gidaadou gii hula gi mee dela itua di waahale, e madalia a Mee i dono haga langaadia. ¹⁴ Idimaa, gidaadou tadau waahale enoho hua beelaa i henuailala ai, gidaadou e halahala di waahale dela ga hanimo. ¹⁵ Gidaadou hagaamu ina a God inia madagoaa huogodoo, e hai ai tadau tigidaumaha mai i Jesus, deela tigidaumaha e hagalaamua di ingoo Jesus i tadau helekai. ¹⁶ Goodou hudee de langahia gi heia godou haihai humalia, hagadau maamaa i godou mehanga, idimaa, aalaa nia hai tigidaumaha humalia e hiihai ginai a God.

¹⁷ Hagalongo gi godou dagi, gi daudalia nia haganoho digaula, idimaa, digaula hagalee dugu di nadau madamada humalia i godou hagataalunga, gei digaula e hai loo gi haga kila aga nadau hegau ang gi God. Goodou ma ga hagalongo gi digaula, gei digaula koia ga tenetene i di nadau hai nadau hegau. Goodou ma ga de hagalongo, gei digaula ga manawa gee, ga deemee di hagamaamaa goodou.

¹⁸ Goodou gi mua hua di hai dalodalo i gimaadou. E hagalongo ia i gimaadou, bolo madau maanadu le e madammaa hua, idimaa, gimaadou e hiihai e hai nia mee ala e donu i nia madagoaa huogodoo. ¹⁹ Au e dangi hagamahi adu gi goodou, bolo gii hai dalodalo ang gi God gi limalima dana hagau adu au gi goodou labelaa.

Talodalo haga lawa

²⁰⁻²¹ God dela ne haga mouli aga tadau Dagi go Jesus mai i baahi digau ala guummade, go Mee dela go di hagaloohi siibi aamua. Mai inia dodo o dono made, Mee ne haga modongoohia bolo di hagababa damana e de ngudu le e donu. Di God di aumaalia gi haga honu ina goodou gi nia hagahumalia huogodoo ala e tau adu gi goodou e hai dono manawa. Gei Mee gi haga gila aga ina

di hiihai o dono manawa i tadau baahi, mai baahi o Jesus Christ, e haga tenetene a Mee. Di madamada ang gi Christ gii hana hua beelaa. Amen.

Nnelekai haga muliagina

²² Ogu duaahina nei, au e dangi adu gi goodou gi hagakono, gi hagalongo gi agu agoago hagamaaloo aga goodou, idimaa, dagu lede ne hihi la hagalee looloo.

²³ Au e hiihai bolo goodou gi iloo bolo tadau duaahina go Timothy la gu ulu gi daha mo di hale galabudi. Maa mee ga limalima mai gi di au, gei gimaua ga lloo adu gi godou baahi.

²⁴ Hagadae ina di madau hagaaloho gi godou dagi huogodoo, mo nia dama a God huogodoo. Nia dama a Christ ala i Italy e hagau adu nadau hagaaloho gi goodou.

²⁵ Tumaalia o God gii noho madalia goodou huogodoo.

Beebaa Dabu

The Holy Bible in the Kapingamarangi language of the Federated States of Micronesia, spoken on the Kapingamarangi and Ponape islands, Caroline Islands

Copyright © 1996, 2014 The Kapingamarangi Bible translation committee

Language: Kapingamarangi

Translation by: The Kapingamarangi Bible translation committee

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-04-24

PDF generated using Haiola and XeLaTeX on 13 Mar 2019 from source files dated 12 Mar 2019

28201f3a-53b9-559a-9b49-00a6f40bcb2a